

Ekwo

Jiona

Onye Mpfuchiru Chileke

Jiona agbaru Chipfu oso

1 ¹ Chipfu ziru Jiona nwa Amítayi ozi sù iya-a: ² “Tùgbua jeshia eze mkpukpu ono, bù mkpukpu Ninive je epfuru opfu nù ndu bu iya nù; kele ejo-ememe, ephe eme rwuwaru eka mu nọ.”

³ Obenu lẹ Jiona gbalihuru gbalaa; ọ bụru iya eje mkpukpu Tashishi. Ọ bya ejerwua mkpukpu Jiopa; bya ahuma ugbo-mini, akwakobe eje onyenimu mkpukpu ono, bù Tashishi. Ọ bya eje apfua ugwo bahu l'ugbo ono. A kporu ugbo ono; ọ bụru pfe eje Tashishi; ọ bụru eka oogbalaru Chipfu.

⁴ Tòbudu iya bù; Chipfu byanu ezia oke pferphere; ọ wata ezi l'eli eze-nyimu ono. Oke akpara-mini wata atutu; tuahaa k'ophu ugbo meaharu g'ọ nyakashihu. ⁵ Ndzụ wata agụ iphe, bukpo ndu nọ l'ugbo ono. Onyenonu wata arọ nshi iya ehu. Ephe pashahaa iphe, nọ l'ugbo wata echie lẹ mini g'ugbo dọ phekpa.

Obenu lẹ Jiona gbero ndukpooro l'ohu ugbo ono; mgbenya tu-mihu iya. ⁶ Onye-ishi ugbo bya ejepfu iya je asụ iya: “?Bụ gunu be iime nno; gube nwophu eku mgbenya? ?Tii tehudu roo nshi ngu ehu g'a maru nshi ngu obu ?l'a-ri-vu anyi l'oriri mee g'anyi ta ala l'iswi?”

⁷ Ndu nọ l'ugbo ono nonyaa bya asụ: “Unu bya g'anyi tu ido gude maru onye bù iya eme anyi ahuma-a.” Ephe bya atua ido. Ọ daaru Jiona.

⁸ Ọ bụru iya bù; ephe jia ya sù iya: “Yeeru anyi onu. ?Bụ onye be ejo-iphē-a, l'eme l'ehu anyi-a shi l'eka? ?I meje gunu? ?I shi awe? Alị eka i shi ?aza gunu? ?I bù onye awe?”

⁹ Ọ bya eyeeru pfe onu sù pfe lẹ ya bukwa onye Hiburu. Lonye ya abajeru eja bukwa Chipfu; mbụ Chileke k'imigwe; onye bù iya meru

eze-enyimu; bya emee alì l'ophu. ¹⁰Ọ bya akọoru phẹ g'ọonwuru yẹle iya. Ẹphe bya amaru l'ọo agbala bẹ oome g'ọ nahụ Chipfu gbala.

Opfu iya ono mee; ndzụ gụahaa phẹ. Ẹphe jĩa ya sụ iya: “?Ọ bụkwanuru gụnu bẹ iime nno?”

¹¹Mini ono nọdu akakpọekwapho achị ọku eje. Ẹphe bya ajĩa ya sụ iya: “?Bụ gụnu bẹ anyi e-me ngu g'eze-enyimu daaru anyi nyonyoronyo?”

¹²Ọ sụ phẹ: “Unu palia mu ephekerephe parụ chie l'ime eze-enyimu-a g'unu ahuma l'ọo-dachaa nyonyoronyo. Mu maru-a l'ọo mu kparụ iphe, oke akpara-mini-a wataru unu atutu.”

¹³O betachia nno; ndu ono tuko ike phẹ mekọta g'ẹphe kpophu ụgbo ono azụ je apfube l'alì; ọphu ẹphe adudu ike; kele eze-enyimu ono kabaa atangirihu eme le g'ọ shi du le mbụ. ¹⁴Ẹphe tuko wata araku Chipfu sụ iya: “Gube Chipfu; jiko te emegbukwa anyi me anyi -gbua nwoke-a. G'ochi onye adudu iphe, o meru ta atukokwaru anyi l'ishi; kele ọ kwa g'ọ du ngu bụ ge gube Chipfu meru.” ¹⁵Ẹphe bya apalia Jiona tufu l'ụgbo ono; woru iya chie l'eze-enyimu ono; mini ono, achị warawara ono buru nyonyoronyo. ¹⁶Iphe ono, meru nụ ono mee; ndu ono wata atsụ Chipfu ebvu ọkpobe atsutsu. Ẹphe gwaa Chipfu bya ekweshia ya ukwe-iphe.

¹⁷Obenu le Chipfu dobewaru ophomu-okazụ, lweru Jiona. Jiona nọ l'ime ẹpho ophomu-okazụ ono ujiku ẹto eswe l'enyashi.

Jiona epfu anụ Chileke

2 ¹Tobudu iya bụ; Jiona bya anọdu l'ime ẹpho okazụ l'eka ono wata epfu anụ Chipfu, bụ Chileke iya. ²O pfua sụ:

Teke mu eje eze iphe-ehuka
bẹ mu rakuru Chipfu.

Ọ numa olu mu.

Ọ buru l'ime alì-maa bẹ mu
chiru g'a gbaaru mu
mkpu.

Ị numa mkpu, mu echi.

³Ị parụ mu chie l'ime
ogbu-mini;
mbụ l'ọhu-alì eze-enyimu.

Utso gbaa gbapyabẹ mu.

Akparamini ngu me
gborogboro,
ọoso nọdukota awụ
mu awụwu.

⁴Mu pfua sụ: A chifwakwaru
mu l'ataphu ngu.

Ọle mu a-dabekwa-a ẹnya

- l'uzo eze-ulo ngu,
du nsọ ọzo.
- 5 Gẹ mini meru g'o ria mu
rimia;
ogbu-mini lwee mu
kawomu.
Elwubara mini kwechia mu
ishi.
- 6 Mu dalahukpoepho l'ohu
l'ohu eze úbvú.
Ohu alì woru mu tya mkporo
ojejeje.
Obenu l'ì gutaru ndzu mu
l'iduma;
mbu gube Chipfu,
bu Chileke mu.
- 7 Teke mu shi abyawaa
atu-buhu unme be
mu nyataru gube
Chipfu.
Mu pfuaha opfu nuhaa
ngu;
opfu mu rwua eka i
no l'eze-ulo ngu,
du nsọ.
- 8 “Ndu bu mkpokoro ntekpe
be ephe turu swiswia
be o too rweudu eka;
mbu eze-iphe-oma ono,
e gege meru phe ono.
- 9 Obenu le mbedua
a-noduepho agu
ebvu-ekele gude
agwa ngu.
Iphe, mu kweru ukwe
ememe be mu e-mekota.
Ndzota bukwa onye ooshije
l'eka bu Chipfu!”
- 10 Tobudu iya bu;
Chipfu bya aturu okazu
ono ekemu; o je agbofu
Jiona l'alì okponku.

Jiona eje Ninive

3 ¹Tɔbudu iya bụ; Opfu Chipfu bya erwua Jiona nchị k'ugbo ẹbo sụ iya: ²“Tugbua je mkpukpu Ninive; mbụ oke mkpukpu ono; je ezia ndu bu iya nụ ozi, mu ziru ngu!”

³Tɔbudu iya bụ; Jiona gbalihu; bya ejeshia Ninive; g'o mee iphe, Chipfu sūru g'o mee. Ninive ono bụ eze mkpukpu, parụ ẹka apaa. Iphe, eejeje ije ẹme aaghabua ya ẹbo bụ ujiku ẹto. ⁴Jiona bya ejee ije ujiku ophu gude bamihu l'ime mkpukpu ono bya eje araa ya arara sụ: “Iphe, ọ phọdu-ru bụ ukporo abali labo; Ninive aburu mkpurupyata.” ⁵Ndu Ninive bya ekweta kẹ Chileke. Ẹphe bya araa ya arara sụ g'onyenonu wata aswiru Chileke ẹgu. G'ẹphe hakota bya eyee uwe-aphu; e -shikpo l'onye kachaa shii l'ime phe; jasụ l'onye kachaa nwanshi.

⁶Eze ndu Ninive bya anuma iphe ono, ada nụ ono; ọ gbalihu l'aba-eze iya; bya eyefu akpawuru uwe eze iya; bya eworu uwe-aphu gbaphua onwiya; bya anodu anoo gwoo onwiya lẹ ntụ. ⁷Ọ bya ezia g'a raa ọra gbaa Ninive mgburugburu sụ:

“Wakwa iphe, eze yele ndu ẹphe l'iya bụ ndu-ishi mkpukpu pfuru baa: G'o tọ dukwa nemadzu; ọzoo anu; ọzoo eswi; ọzoo aturu, a-duru iphe, ooriri; ophu ọ dukwa onye a-ngu iphe, aangụ angungu. ⁸G'a tuko nemadzu mekpoo anu phukota uwe-aphu. G'onyenonu wata araku ẹpha Chileke ẹgwegwa. G'ẹphe tuko haa ẹjo-ememe, ẹphe eme; mekpoo mkpawere, ẹphe eme ndu ọzo. ⁹G'a maru ?Chileke a-ghakobe gude obu-imemini iya gbanwee oke ẹhu-eghu iya ono; k'ophu anyi taa laedu l'iswi.”

¹⁰O be teke Chileke humaru iphe, ẹphe meru; waa g'ẹphe gude ghakobe haa eme iphe-ẹji phe ono; ọ phuru phe obu-imemini; ophu o mebyishiduru phe g'o shi chia dobe lẹ ya e-mebyishi phe.

Ọvuma, Jiona avuru Chileke

4 ¹Iphe ono dū Jiona ẹji ntumatu. O ghuaaha ya egu. ²Ọ bya epfua-haa nuaaha Chipfu sụ: “Gube Chipfu; ?tọ budo iphe-a be mu pfuru teke mu no l'alị anyi-a? Ọ kwa iphe-a meru g'o gude mu mee ẹgwegwa jeshia mkpukpu Tashishi; kele mu maru l'i bụ Chileke, menukaru eze-iphe-oma; ẹme i nodu aphuje obu-imemini; ophu ẹhu egहुjedu ngu egu ẹgwegwa; ẹme i nodu eyeje obu yegharu iya ẹka; i buru Chileke, e tee ekwojedu gburumu mee ge nemadzu buru ọla-l'iswi. ³Nta-a; gube Chipfu; gbua mu egbugbu; kele anwuhu ka mu ree eme l'anodu ndu.”

⁴Obenu lẹ Chipfu yeru iya onu sụ iya: “Ehu-eghu ọwa-a, egu ngu nua-a ?ọ gbaru ngu-a?”

⁵Jiona tugbua je anodu anoo l'eka lanu lẹ mgboru mkpukpu ono; l'uzo enyanwu-awawa iya. O je je aturu onwiya mkpu l'eka ono; bya eje anodu lẹ mkpula iya leaha ẹnya ge ya maru iphe, e-mechaa mee mkpukpu

ono. ⁶Tɔ̀budu iya bụ; Chipfu, bụ Chileke bya emee gẹ vayinu futa l'ẹka ono; bya emee ya; ọ bachishia ẹkameka lẹ mkpula ẹka Jiona nọ bya emee g'ibvù dū l'ẹka ono gẹ Jiona ta aghaḡe chiri-chiri. Vayinu ono mee; ẹhu tsọahaa Jiona uto shii. ⁷Obenu l'o beru l'utsu; lẹ nchitabọhu iya; Chileke bya eye unwu-ẹhu; ọ bya atanwụa vayinu ono; ọ nwulwashihukota. ⁸Tɔ̀budu iya bụ; anwụ chifuepho; Chileke bya awata ezi oke pherephere uguru, shi l'uzo ẹnyanwu-awawa; teme anwụ chiahaa Jiona igbangu igbangu l'ishi; k'ọphu meji tofuharu iya atofu. Ọ dū iya g'a sū lẹ ya nwuhuru. Ọ sū: “Anwụhu kaakwa mu nū ree eme l'anodu ndzū.”

⁹Tɔ̀budu iya bụ; Chileke bya asū Jiona: “?Ọ gbaru kẹ g'ẹhu wata ngu eghu eghu lẹ kẹ vayinu ono tọo?”

Ọ sū iya: “Ee! Ẹhu eghukwa mu eghu. Mbụ l'iphe, agū mu nū nta bụkwa anwụhu.”

¹⁰No iya; Chipfu bya asū iya: “?I humaru gẹ kẹ vayinu-a atsu-be ngu l'ẹhu; l'ẹbe abū l'ọo ngu kuru iya; ọphu ọ budo ngu meru iya ọ baahaa ụba. Nchi byaru abọhu; o futawaa. Nchi bya l'abọhu ọzo; ọ nwuhuwaa. ¹¹Obenu lẹ mkpukpu Ninive bẹ ndu bu iya nū daghataru ukporo unu umadzu iri l'ise^a, bụ ndu amadu onwophe ẹkicha; ọzoo ẹkutara; ẹphe nwekwarupho ikpoto eswi. ?Bụ eze mkpukpu, ha ẹgube ono bẹ mu tege aphuduru obu-imemini tọo?”

^a 4:11 Bụ iya bụ 120,000 lẹ mbekee.